

中國近代文學叢書

上海古籍出版社

偶齋詩草

下

寶廷 著

聶世美 校點

中國近代文學叢書

上海古籍出版社

偶齋詩草

下

寶廷 著

聶世美 校點

偶齋詩草外集卷一

壬庚集

壬子至庚申

擬韋柳

壬子

攜壺步平蕪，坐石村醪酌。野鳥銜禾飛，山空日將落。閒雲歸碧山，流泉響深壑。醉後臥青苔，伴者惟玄鶴。莫笑貧且賤，頗饒山水樂。

湖上

庚申

飯後步湖西，閒遊趁斜景。徐行過斷橋，樓邊立俄頃。日落蒲葦涼，荷香鷗鷺靜。倚闌望長空，莓苔透衣冷。

湖上晚步

雨餘行湖隄，沙岸靜如洗。日落水風涼，飄飄葛衫起。遠天青壓山，殘霞紅滿水。隔岸碧峯連，蒼烟迷數里。信步至高亭，石檻披衿倚。昂頭一長嘯，白雲生樹裏。

翠隱亭

日午水風涼，苔階眠乍醒。山鳥兩三聲，滿池楊柳影。

寺居集

庚申至壬戌

雪後閒步

緩步西郊外，涼風透敝袍。飢鳥啼古木，落雁聚平皋。雪滿遠山近，雲開寒日高。緣途多逸趣，遊覽不知勞。

春日風

青天萬里化爲地，黃沙四起愁雲積。寒日無光北風厲，狂塵捲樹行人昏。波濤斗湧當街喧，污泥亂石同掀翻。須臾霾散風頓止，遙空色似雲藍紙，敗葉滿階飛不起。

早春

暖日揚輝遍小庭，韶光乍到尚無形。東風有意私楊柳，萬縷千絲早變青。

元元集

癸亥 甲子

塞下曲

衰草滿地秋山高，壞雲壓陣西風號。黃塵捲樹白骨立，冤魂無語隨霜刀。銜枚疾趨住不得，馳驟縱橫勇無敵。戰鼓一聲關月紅，旌旗十里邊風黑。壯士揮鞭踏敵營，往來攻擊刀槍鳴。戰血橫衝人面灑，劍光斜繞馬頭明。殺聲徹夜深巖裏，烈火飛騰遍山起。黎明奏

凱大軍還，人首垂紅溼馬尾。

擬陶公歸田園居用第一首韻

嬾作州縣吏，力畊歸故山。飢寒無復憂，喜逢大有年。林下結茅屋，蓬戶臨清淵。不敢自憚勞，日日來平田。送飯碧溪上，食牛黃葉間。隣叟伴我行，稚子導我前。夕陽下山外，村落生炊烟。羣鳥銜食歸，爭飛喬木顛。耕種暮已畢，倍覺身心閒。把酒坐檐下，胸中彌坦然。

妾薄命

從古紅顏多命薄，姻緣縱好無非惡。才能詠絮貌如花，蹉跎難遇多情客。妾薄命，固堪悲；郎薄命，當怨誰？

苦寒行

茫茫乎積雪千里無人行，微陽慘淡愁雲平。風頭如刀面膚裂，血流鬚髮凝丹冰。車滑

滑兮將傾，馬戰戰兮不鳴。驚沙攬雪打人面，鳥藏獸匿四野寒無聲。筋疲骨瘁肌肉僵，嚴寒酷冷焉能當。口氣如白雲，著手旋成霜。苦寒行，良可傷。

閨怨

璇閨獨處幾經年，每憶蕭關倍黯然。生怕遠人歸未得，含悲不敢擲金錢。
鎮日含悲坐繡幃，羅裙寬褪減腰圍。雲鬟不整眉慵掃，閒弄檀郎舊日衣。

春日雜詩

莫說窮居苦，春來景物嘉。鳥聲半林日，人影一闌花。困頓何須慨，飢寒枉自嗟。感時當盡醉，休負此韶華。

閨怨

愁多不知病，終日卧香衾。自是儂薄命，何曾郎負心。
稟砧久不歸，別恨無時已。縱使不思儂，亦當思鄉里。

離愁不可說，日日望遼陽。窗外合歡樹，離君將十霜。

四時閨詞

歲月如梭擲，匆匆已數春。遙知玉關外，應有憶家人。
斜照滿迴廊，石榴豔如火。睡起整羅衫，獨向花間坐。
西風吹翠幕，桐葉滿階除。悄卧秋窗下，看郎去歲書。
香閨夜不眠，朔風樹間大。殷勤謝朔風，莫到蕭關外。

田家

隱跡荒田中，安樂無憂患。半生勤農工，精力老逾健。種田百餘畝，處處良苗遍。舊穀隔年儲，新蔬逐時變。兒孫解耕耘，童稚識呼喚。衣食不須慮，誰復知貧賤。即此終天年，外物無所羨。

一夜春雨急，杏花開滿村。野老率兒童，破曉來平原。驅牛野泥滑，負耒春風溫。日暮畊種畢，高唱歸柴門。歡呼索酒食，雜坐忘卑尊。食罷即酣眠，不知寒與暄。

月下洗面

月下濯瓦盆，鬚眉皆可見。
揮手弄盆水，盆中明月亂。
舉頭看天邊，明月依舊圓。
低頭看盆底，明月仍在水。

山阿集

甲子

擬徐庾體

涼夜倚窗坐，風景使人悲。
雲將暮雨去，月帶秋河移。
飢烏啼古樹，寒花明短籬。
別離已數載，竟夕獨相思。

又

獨立柴門外，涼颼拂面過。
村燈遠觀淡，山樹暮看多。
林疏露微月，星密亂明河。
清宵難自遣，掩袖淚滂沱。

揭曉前一日與文鏡寰滿敬之清階平飲酒

今日固是夢，榜前宴會，俗謂之「喫夢」。明日豈遂醒。人生天地間，終身與夢等。有酒且暢飲，莫負明月影。功名果何物，無妨心暫冷。夢中須覓樂，百歲原俄頃。

學舌耕集

甲子 乙丑

秋思

伊人不可遇，獨坐傷心神。含愁倚北窗，極目秋無垠。木落遠山近，雨過斜照新。相思難自遣，覽景添悲辛。

冬獵行

北風捲樹寒山鳴，黃沙百草連天平。虎狼怒吼兔狐泣，火光逼日烟塵腥。攀巖越嶺重圍合，弓刀燦爛人聲急。風毛雨血亂寒空，馬作龍飛獸人立。縱橫馳驟窮林藪，凍雲莽莽

迷前後。驕鷹逐兔挾風飛，怒犬衝人穿火走。健兒攘臂爭英雄，須臾蹴踏寒山空。驚禽逸獸自相搏，血流澗壑層冰紅。將軍大笑投弓起，返旆旋城士卒喜，日落天寒暮山紫。

將進酒

吁嗟乎！君胡不進杯中酒，辜負蒼天生此口。狂吟縱飲須盡歡，古今無物能長久。家貧身賤何須傷，生前死後同茫茫。筆下有詩天有月，花間正可空千觴。呼僮提壺過酒家，沽來共飲同喧譁。酒氣成雲酒如雨，詩腸潤透心生花。一樽復一樽，酒空人已醉。君醉君自行，不行且同睡。人生不飲真徒然，君不聞天有酒星，地有酒泉，人有酒仙。

經故居

披衿閒步聳吟肩，風捲殘花拂面旋。滿地月明人語寂，夜深行過故居前。

山居

山中多樂事，地僻絕塵埃。過雨倚窗坐，流雲穿樹來。培花移碧草，掃逕避青苔。偶

有良朋至，高齋句共裁。

續西洲曲用元韻

吹夢到西洲，隨風渡江北。舉頭見檀郎，猶是舊顏色。問郎居何處，遙指垂楊渡。渡口即郎門，隔江惟見樹。攜手至門前，低頭整翠鈿。含情不肯入，同看水中蓮。蓮開西洲秋，花花多並頭。並頭亂結子，纍纍照清水。相隨至門中，蓮花映頰紅。忽驚香夢醒，嘹唳聽歸鴻。夢醒憶西洲，含愁獨下樓。躊躇無所適，棹舟來江頭。江岸曲復曲，江流如碧玉。凝眸望江邊，蹙破雙蛾綠。江水去悠悠，滿江雲影愁。青山一痕外，仿佛是西洲。

無題

春花幾日紅，轉眴多秋草。不恨相見遲，但恨別離早。

鳴秋集 乙丑

蟋蟀

荒原雨過景淒淒，籬豆花殘半作泥。
衰草一隄秋露冷，月明獨立斷垣西。

塞上曲

黃雲壓城白日寒，飛沙打樹秋草乾。
漢家大將統貔虎，鳴金伐鼓過燕然。
單于傾國雄師動，馬騰士飽同驍勇。
獵火炎炎接紫臺，烽烟漠漠連青塚。
荒原格鬪風塵昏，強虜十萬齊崩奔。
殘兵負甲哭空壘，戰馬拖尸馳破村。
軍中自古異苦樂，効命疆場空踴躍。
陣前白骨塞溝渠，帳下黃金滿囊橐。
邊庭遠戍十年餘，昔日雄兵半白鬚。
丹鳳城邊空有夢，白狼河外久無書。
將軍禦敵多良策，不使朝廷勞擘畫。
鼓角無聲關月明，旌旗不動胡天碧。
荷戈從役莫酸辛，同是王家禦侮臣。
諸君欲上麒麟閣，休使邊功誤後人。

病中作寄皆平白石子美

吁嗟乎！天地之間疇不死，古往今來盡如此。茫茫十二萬年中，彭殤相去須臾耳。聖賢莫能度，流俗將何之。神仙雖長生，尚須解其尸。如來當日亦背痛，性靈不滅稱神奇。世間惟有虛空永不壞，既然有質那得無無時。漆園禦寇發高論，曠達亦是無聊思。玄天黃地猶復有混沌，人生百歲尤微微。天之外其何如？地之下其何居？鬼神殊恍惚，安知誠有而誠無。生人昏昏如夢寐，夢中枉自勞神智。縱使洞澈天地死生因，折衷無據空辭費。動植飛潛，各遂其天。榮枯修短，終歸杳然。死前歡樂縱盡致，片時快意殊堪憐。明知人生本無謂，低頭強學生人事。五官百體爲誰忙，攘攘傀儡同登場。聰明才力枉出衆，一朝氣散萬種同銷亡。噫！悠悠千古同此哀，嗟予一人將欲胡爲哉？

歲餘集 乙丑

山海關行送李叙九從軍

青山接天危城高，海風捲地翻驚濤，旌旗閃閃斜陽搖。畫角一聲關門放，天兵十萬從

空降，霜矛雪劍皆東向。烽烟不動胡天青，飛沙打樹邊風腥，滿山戰血凝紅冰。銜枚疾走不成列，寒霜打面面膚裂，馬聲戰掣人聲咽。雄兵猛將同爭功，軍威直薄遼陽東，天戈一指妖氛空。

送叙九

萬馬下遼東，烽烟接混同。旌旗翻塞雪，鼓角亂邊風。鐵嶺寒雲黑，銅溝戰血紅。雄師天上落，指日奏膚功。

戎馬東京起，將軍下漢廷。陣雲連塞紫，邊樹入關青。返旆知何日，征車不暫停。燕然如有志，濡筆我能銘。

閒吟集 丙寅

五古

晴日滿南檐，隔窗生暖氣。倦坐倚疏櫺，不飲渾如醉。折柬欲題詩，未就已成寐。夢

醒開倦眸，瓶中花半墜。

聞妙香集

丙寅

相思字

嫣紅一樹子低垂，萬點胭脂綴滿枝。
幾度攀條不忍摘，可憐草木尚相思。

返魂香

名香手蘸淚偷彈，聚窟洲遙覓路難。
縱使花魂能再返，爭禁風雨日摧殘。

連理枝

西風颯颯雨絲絲，宰樹無言翠蔭垂。
死後生前總離別，何須連理又成枝。

不死藥

香魂豔魄共悠悠，錦片良緣一霎休。漫向仙山采靈藥，縱能醫命不醫愁。

無謂集 己巳

秋日登陶然亭

黃塵捲地青天無，寒雲慘淡斜陽枯。狂風四起寺欲動，波濤萬頃翻荒蘆。雪花亂湧捲平地，青瀾黃浪飛空際。近村遠樹盡茫然，漫漫四野生秋氣。去年來遊時，風景何清真。今年復來遊，風日同昏昏。疑是天公怕詩落窠臼，故將舊景重翻新。遠山避人不可見，荒城古木秋聲戰。殘花敗葉空中煽，憑闌縱眺目光亂。興來落筆新詩成，狂吟拍掌西風驚。仰空大笑問蒼昊，新詩可如舊詩好？

夢遊桂林山歌送丹五

青天壓山山欲摧，青山插天天欲開。天山相觸不肯讓，化成一片青無涯。夢中問山